

Date – 22/05/2026

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. Ramchhung hmun dang ang bawkin Mizoramah pawh indo denchhena inrenchemna kalpui a ni.
2. ICT Minister Dr. Vanlalhlana chuan school syllabus-ah Artificial Intelligence dah turin hma lak mek a nih thu a sawi.
3. Indian Oil Corporation Limited chuan tuialhthei chhekkhawl a la that rih thu a sawi.
4. Sawrkar laipui chuan nimin khan west Asia a buaina kalzelah thuchhuah siamin India chuan Petrol, diesel, natural gas leh LPG ah te supply a kalpui reng tih an sawi.

<><><>

USTERITY MEASURE

Ramchhung hmun dang ang bawkin Mizoramah pawh indo denchhena inrenchemna kalpui a ni a, nimin atang khan sorkar hnathawk te pawh thuang hnih in Pisa an kal.

General Administration Department (GAD) thu chhuak angin, school leh office kal hun chu thuhmun lo deuha siam a ni a, kalkawnga traffic jam tih ziaawmna tur niin, hei hian tuialhthei hman a tih tlem theih beisei vang a ni a, kan corr chuan Aizawl khawpuiah lirthei tawt lutuk chu a ziaawm phah deuh niin a lang a ti.

Aizawl khawpui chhunga Petrol Pump thenkhatah tuialhthei lak tum intlar hmuh tur an awm a, hetih lai hian Supply Department atanga thu dawn dan chuan Oil chungchangah harsatna a awm lo a, filling station thenkhat an Oil la thleng lo khaihlak an awm palh a ni thei bawk niin an sawi.

Akashvani News zawhna chhangin FCS&CA Department Director Pi Saizikpui chuan, tuialhthei chungchangah harsatna a awm lo tih sawiin buhfai chhekkhawl pawh a tha tawk a, thingtlang lam chauh ni lovin Aizawl khawpui tan pawh Buhfai dahkhawl a tha tawk a ni, a ti.

Kan corr report i lo ngaithla ang.

VC

Sorkar thuneitu lam chuan inrenchemna hi an kalpui nghal a, chief minister leh minister te pawhin zuitu an neih chu tih tlem a ni.

Hetih lai hian Mizoram sorkar chuan tuialhthei chungchangah mipui chu inrenchem turin a chah a. Nimina thuchhuah a siamah, Mizoram chu state pawn atanga bungraw chaw lut thin a nih avangin, ram chhunga tuialhthei man pung leh bungraw phurh man pung hian a nghawng nghal lo thei lo a. Heng te avang hian sawrkar sum renchem kawngah leh heng thil hlu vawn chungchangah a theih ang ang hma la turin Sawrkar chuan mipuite a ngen a ni.

(Corr Ts-a)

<><><>

CONVENTION FOR WOMEN VC

Village Council Hmeichhe member te Inkhawmpui hmasa ber chu nimin khan Aizawl Vanapa Hall-ah hman a ni a, Health Minister Pi Lalrinpuiin a hmanpui.

Minister chuan, ram pum thlir chuan hmeichhe dinhmun a sang lo thin a, tunah chuan khawsak phung mai bakah Politics huangah pawh hmasawna a nasa a - Mizoram in hmeichhe Cabinet Minister a nei ta hial chu chhinchhiah tlak a ni a ti.

Pi Lalrinpuii chuan hmeichhe dinhmun a san chhoh ve tak rual chiahin mawhphurhna a sang ve nghal tih a sawi a. Mahni hna leh chanvo hrechiang a, hmeichhe VC te chu thutkhawm pawimawhah te mahni ngaihndan thawh a, ngaihtuahna seng takzet turin a chah bawh a ni.

(Byte: Pi Lalrinpuii)

He huna thu sawitu dang West Tuipui bialtu MLA Pi Prova Chakma chuan hmeichhia te chu inchhung khura awm tam an nih avangin fa te enkawl that kawngah mawhphurhna an nei sang tih a sawi a, hemi rual hian ram rorelna kawngah pawh dinhmun pawimawh luantu an ni tih a sawi bawh.

Aizawl South III bialtu MLA Pi Baryl Vanneihsang pawhin thu sawiin, hmasawna hna tha taka thawk tur chuan Minister leh MLA te chauh ni loin am biala VC ten an lo thlawp that a pawimawh tih a sawi a, tanrual chuan thil harsa leh theih loh anga ngaih te pawh a tih theih thin tih a sawi a ni.

Tun dinhmunah Mizoram pumah hmeichhe VC member 908 an awm mek a ni.

<><><>

RINI SPEECH AI

ICT Minister Dr. Vanlalhlana chuan school syllabus-ah Artificial Intelligence dah turin hma lak mek a nih thu a sawi.

Nizana Mizo tawnga thusawi lo ziak thei, Rini Speech AI tlangzarhna hun a hmanpuinaah he thu hi Minister chuan a sawi a. Minister chuan Rini Speech AI chu ram leh hnam tana thil chhinchhiah tlak tak a nih thu a sawi a. ICT dept thlirna atang chuan mobile app thar pakhat mai a nih loh thu sawiin digital khawela Mizo nihna leh tawng humhalh nana lungphum pawimawh tak a nih thu a sawi a ni.

Minister chuan AI technology hmanga hmasawna tawn chhoh mek lain Mizo tawng a hnungtawlh thiang lo tih a sawi a. He app hian naupang te nasa leh zualin Mizo tawng hman dan dikah a kaihruai theih a beisei thu a sawi a bawh a ni.

Rini Speech AI duangchhuaktu Instaword Co Founder leh CEO Dr. Maria Sailo chuan Rini Speech AI chu Mizo tawng humhalhna tur leh chawisanna tura duan a nih thu a sawi a ni.



MIZO SONG COMPOSERS

Mizo Song Composers' Society chuan AI hmanga Mizo hla phuah sa lo sak tir a, lo thehdarh tawhte chu la thla leh vek turin an ngen.

Nimina an thuchhuaha an tarlan danin, tunlai hian Mizo hla engemawzat, a phuahtu leh neitute phalna leh hriatpuina tel miah lova Artificial Intelligence (AI) hmanga khawih danglama, YouTube leh platform dang hrang hranga dah chhuah a tam hle a, heng thil hi ti tawh lo tur leh a lo ti tawhte pawh delete nghal turin an hriattir a ni.

MSCS chuan hla phuahtute hnen atangin lungawi lohna leh hetiang thil avanga harsatna an tawh thu tam tak an dawn thin thu an sawi a. Hetianga mi hla, phalna la hmasa lova AI hmanga lo saktira thehdarh hi dan dinglai hnuaiah 'thil sual' a nih thu an tarlang bawh.

MSCS chuan hetiang a lo ti tawh zawng zawngte chu a rang lama paih turin an hriattir a. A ti mek te leh ti tum an awm a nih pawhin tawpsan nghal turin an ngen a. An ngenna min zahsak lova, ti lui an awm a nih chuan dan hnuaiah hma lak a ni dawn tih an tarlang nghal bawh a ni.



SIR 2026

Election Commission of India duhdan angin Chief Electoral Officer (CEO) Pi Garima Gupta chuan nimin khan Special Intensive Revision of Electoral Rolls 2026 kalphung tur sawiin, SIR 2026 kaihhnawih thil pawimawh hrang hrang a tarlang.

CEO chuan Special Intensive Revision 2026 thiltum ber chu vote nei thei zawng zawngte Electoral Roll-a thun vek an nih theihna tur leh vote nei thei lote E-Roll a an luh lohna tura hmalak a nih thu a sawi a. Electoral Roll thianghlim leh felfai siam chu an hmalakna pawimawh ber a ni a, chu chu democracy inngahna bulpui a nih thu a sawi bawh.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



HEROIN SEIZED

Excise & Narcotics Department leh 14th Bn. Assam Rifles te thawkdun chuan nimin zing dar 1:30 khan Zote By-Pass Road, Champhai District-ah Heroin Hawng 50 leh a neitua puh an man.

Heroin neitu nia puh an man hi Jaydanamul Barbhuiya (28), Lokanathpur, Cachar District, Assam-a khawsa nia inehhal a ni a. Heroin te hi Myanmar atanga lokal, Assam-a tihral tura ruahman a ni a. Heroin phurhna atana hman TATA Truck (Regn No AS01MC-7551) pawh hrensak nghal a ni.

Heroin vanga man hi NDPS Act Section 21(c)hmangin thubuui siamsak a ni a, District & Sessions Court, Champhai-ah hruai nghal a ni a. Court-ah thiamloh a chang a nih chuan Kum 10 atanga kum 20 Jail tang tur leh pawisa Cheng Nuai 1 atanga cheng Nuai 2 thleng chawi bawk tura hrem theih a ni.

<><><>

HLIMEN PLAYGROUND

UD&PA minister Pu K. Sapdanga chuan Hlimen ah Aizawl Smart City Limited hnuuia sak Hlimen Football khelmual a hawng a, he khelmual hi cheng vbc10 leh nuai 65 senga sak a ni.

Hawna inkhawmah hian Pu K. Sapdanga chuan thu sawiin, Ram pumah Mizote chu football khel thiam hriat an ni a, ISL leh I-league ah te pawh player chhuanawm tak tak an awm a ti a, he hmingthatna hi chhawm nun a nih zel theihna turin khelmual hawn thar pawh hian kawng ro tam tak a sut kuak ngei a beisei a ti a, field nuam satliah lo, thalai tam tak football lam a mi chhuanawm chher chhuaktu a lo nih a, hriselna kawngahte, mahni invawna kawngahte Hlimen khawtlang tan pawh malsawma thlen theitu a nih ngei a beisei thu a tarlang bawk a ni.

Bialtu MLA Pi Baryl Vanneihsang pawhin thu sawiin, Hlimen khawtlang tan ni chhinchhiah tlak tak a nih thu leh, khelmual hawn thar chu thalaite tan eizawna ngialnghet siam saktu a nih ngei a beisei thu a sawi bawk a ni.

<><><>

OC

Indian Oil Corporation Limited chuan tuialhthei chhekkhawl a la that rih thu sawiin, ramchung ah tuialhthei tlakchham a awmluh thu an tarlang.

Social media a tarlan danin Indian Oil chuan tuialhthei hralh leh khuahkhirh chungchangah thuchhuah an neihloh thu leh tuialhthei chhekkhawl a tam thu an sawi.

Indian Oil chuan mipuite chia lo tur leh thuchhuah rintlak chia ngaihven tur a ngen in, ram pum ah fuel hnianghnar tak a kalpui an tum thu an sawi a ni.

<><><>

CENTRAL GOV ON GAS & PETROLEUM

Sawrkar laipui chuan nimir khan west Asia a buaina kalzela thuchhah siamin India chuan Petrol, diesel, natural gas leh LPG ah te supply a kalpui reng tih an sawi.

Ministry of Petroleum and Natural Gas Joint Secretary Sujata Sharma chuan theihtawp a hma an lak mek thu sawiin, petrol pump zawng zawng hman theih nan a hma lak mek niin, eirawngbawlna gas supply pawh chaw lo a kal zel thu a sawi.

Ministry of Ports, Shipping and waterways Additional Secretary Mukesh Mangal pawh in tuipui a thawkte tan harsatna leh buaina awmlo a an thawh theihnan hmalak zel anih thu tarlang in Ministry of External Affairs, Indian Missions leh maritime stakeholder te nen inbiakna an neih reng thu a sawi a ni.

<><><>